

Erich Bolinius  
[www.erichbolinius.de](http://www.erichbolinius.de)

**(Bericht über den BSV Kickers Emden**

Sendung „Flutlicht“ auf Radio Ostfriesland

**Donnerstag, 20.2.2014 18.00 Uhr** auf 94.0 bzw. 87,7)

Moin, leev Toehörers,  
wat was dat güstern Abend moi, dat ennelk weer – na de völe Overdragen van de Olympische Winterspölen in Russland - 'n Foetballspöl in de Kiekkast overdragen wurr. Man mag ja vör de Bayern wesen of neet. Man, spölen könt se heel prima – un so hebben se ok tegen Arsenal in London verdeent mit 2:0 winnen. Ik fraag mi, well sall disse Bayern egentlik slaan?

In uns Kuntrei sücht dat ja 'n bietje anners ut. Wi sünd ja al blied, da Kickers Emden in dit Jahr in de Landesliga Weser-Eems spölt – un neet ofstiggt. Ik löv ja, dat Kickers noch 'n Bült Punkten haalt un wieder na boben in de Tabell kummt. För de anner oostfreeske Mannskuppen sücht dat ja neet so goed ut. Leer, Bunn (Bunde) un Pesem (Pewsum) stahn all up Ofstiegplatzen. Pesem hett lesd Week in Lohne wall goed spölt un sogaar tweemaal föhrt, man an Enn doch weer verloren.

Bunn de eerst dree Punkten haalt harren, hebben tegen de Tabellentweed Melle mit 2:2 een Punkt haalt. Respekt: De geven sük neet up.

Kickers Emden hett lesd Wekenenn Fründskuppsspöl in Thüle, dat liggt in de Landkring Cloppenburg, tegen de Tabellenföhrer in de Bezirksliga Mitte, Hansa Frisothe, mit 6:2 winnen.

Dat was al in Klassenunnerkeed, un wi hebben dat Spöl klaar domineert, see „Teammanager“ – war för 'n moi Naam – **Arno Janßen**.

Kickers Trainer **Markus Olbrys** hett in dat Spöl eenige Varianten utprobeert. Un dat hett goed henhauen. So föhrte Kickers Emden al na 23 Menüeten dör Toren van **Bernd**

**Grotlüschen, Carlos Santos da Luz** und **Aziz Timur** mit 3:1. De hoog Sieg skoot Kickers aber eerst toe Enn van dat Spöl rut. **Tido Steffens** skoot noch 2 Toren un **Steffen Meyer** dat lesd in de 85. Menüte mit 'n Elfmeter.

Güstern in Grootfehn sach dat för Kickers Emden neet so goed ut. Grootfehn gung sogar dör Specht in de 52. Menüte mit 1:0 in Föhren. Man al veer Menüeten later gleeck Steffens ut. Un dorbi bleev dat bit toe Enn van dat Spöl. Dat Spöl sullen de Spölers gau ofhaken, umdat an Sönnitag na Oldenburg tegen de TSV, de mit 28 Punkten up de 8 Tabellenplatz liggt, geiht. Dat word seker neet licht för Kickers Emden. Man Kickers hett dat lesd Punktspöl in Lohne ok winnen. Worum sull dat dit Maal anners worden? In de Kickers-Fanforum tippt Kickersfan oldcharly, dat Kickers mit 1:0 winnt. Hopen wi maal, dat he Recht behollt.

Was moi, wenn 'n Bült Fans de Fahrt na Oldenburg mitmaken würrn, um de Mannskupp van Kickers Emden antoefüren.

Hier in 't Studio word ja ok alltied tippt, wo dat Spöl utgeiht. Ik tipp maal up 3:1 för Kickers Emden.

So, nu noch toe Schluss, 'n neei, aktuelle Foetballsprök:

„Egentlik kann man so 'n Spöl neet winnen, wenn eenersiets de Schiedsrichter toe minn sügg un annersiets de Streekrichter (Linienrichter) toe völ“, meente Frankfurts Trainer **Armin Veh** na 'n neet gevene Elfmeter un een neet gevene Tor in Leverkusen.

So, leev Toehörers van Radio Oostfriesland,  
ik hoop, Joe hett dat Plattdüütsk gefallen, denn mien Motto heet ja alltied,  
plattdüütsk dürt - nettso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.

.